

**Tiada keterangan kukuh, Putrajaya tidak rayu keputusan kes Razak Baginda**  
**The Malaysian Insider**  
**March 30, 2015**  
**Oleh Diyana Ibrahim**

Putrajaya memutuskan tidak merayu terhadap pembebasan Abdul Razak Abdullah Baginda kerana Jabatan Peguam Negara tidak mendapati wujud keterangan kukuh dan mencukupi, kata Nancy Shukri.

Menteri Di Jabatan Perdana Menteri itu berkata, keputusan dibuat untuk tidak memfailkan rayuan berdasarkan kajian yang menyeluruh.

"Berdasarkan keterangan yang dikemukakan semasa perbicaraan mahkamah, kajian menyeluruh dilakukan ke atas kes yang dikemukakan oleh pihak pendakwaan untuk menentukan sama ada rayuan terhadap perintah Mahkamah Tinggi perlu dibuat atau tidak.

"Setelah dikaji dengan teliti dan mendalam, Jabatan Peguam Negara berpendapat tiada keterangan yang kukuh dan mencukupi bagi membuktikan penglibatan Razak dalam pembunuhan Altantuya.

"Oleh yang demikian, keputusan dibuat untuk tidak memfailkan rayuan," katanya menjawab pertanyaan ahli Parlimen Taiping Nga Kor Ming.

Razak dituduh bersubahat dengan bekas anggota polis Unit Tindakan Khas Azilah Hadri dan Sirul Azhar Umar melakukan pembunuhan terhadap wanita Mongolia Altantuya Shaariibuu.

Razak dibebaskan daripada tuduhan bersubahat dengan pembunuhan itu pada tahun 2006, tetapi dua bekas komando polis itu didapati bersalah oleh Mahkamah Persekutuan selepas rayuan terakhir pada 13 Januari lalu.

29 Januari lalu, buat pertama kalinya Razak membuat kenyataan mengulas mengenai insiden membabitkan Altantuya, yang merupakan teman wanitanya.

Bercakap kepada The Malaysian Insider ketika itu, Razak berkata spekulasi mengenai kes itu sudah sampai ke tahap tidak masuk akal dari segi segala spekulasi yang timbul.

Pada 9 April 2009, Mahkamah Tinggi menjatuhkan hukuman mati ke atas Azilah dan Sirul selepas perbicaraan berterusan selama 159 hari.

Pada 23 Ogos, 2013, panel tiga hakim Mahkamah Rayuan membebaskan dua anggota polis itu kerana kekurangan bukti. – 30 Mac, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/tiada-keterangan-kukuh-putrajaya-tidak-rayu-keputusan-kes-razak-baginda>